

四庫全書

集部

欽定四庫全書

范太史集卷三十

宋 范祖禹 撰

翰林詞草

班荆館賜大遼賀坤成節人使回程御筵口宣
卿等使華復命郊館留行臨遣近臣特伸飲餞勿辭既
醉用副眷懷今差內侍省內西頭供奉官董溫之賜卿
等御筵想宜知悉

班荆館賜大遼賀坤成節人使回程酒果口宣

卿等徒馭旋歸山川悠緬抗旃首路杞轄頒恩加錫芳
甘式昭勤厚今差內侍省內侍殿頭王祺賜卿等酒果
想宜知悉

相州賜大遼賀坤成節人使回程御筵口宣

卿等壽辰展慶瑞節言歸聊息駕於近藩因肆筵於華
館式頒燕衍益示恩榮今差內侍省內侍殿頭梁敦賜
卿等御筵想宜知悉

賜資政殿學士守吏部尚書胡宗愈乞知揚州

不允詔

卿昔在先朝素推颺直迺者輔政未幾懇請守藩西蜀
宣布流聞甚美以卿舊德宜在朝廷入長天官民望攸
屬夫賢人進退繫國重輕而以私恤遽求外補春秋之
義不以家事辭王事姑安厥位以副眷懷所請宜不允
賜觀文殿大學士集禧觀使蘇頌乞致仕不許

詔

祖宗以來貴德尚齒鼎槐之老莫不眷留班于大廷表

儀百辟卿向由省轄進涖宰司深執勞謙懇求去位置使祠館勉徇雅懷已退處於丘園尚何殊於田里矧卿筋力克壯聰明不衰中外所瞻足以重國體茲至意無或費辭所請宜不許

不允詔

古者三公在朝三老在學或坐而論道或就而咨謀身雖佚休不離王室降及後世則異於斯以蟬蛻軒冕為高以履遺祿位為潔卿多識前世之載雅意本朝之隆

君臣之交禮義相與乞身之請姑務少安所請宜不允

賜龍圖閣學士知瀛州魯布乞揚州不允詔

卿昔在先朝服休侍從宣力中外靡憚勤勞南臨長沙
實濟師役西控青海以威羌戎眷言老成付以北道疆
場無事使傳相望緩帶雅歌足以綏靖忽攬封奏欲求
便藩尚當勉留以副寄委所請宜不允

賜宰相呂大防上劄子乞罷不允詔

省所劄子奏重任久次今茲譴戒所加殆緣臣致伏望

獨罷事具悉朕恭聞仁宗皇帝因讀前史嘗諭侍臣漢
以災異策免三公莫若罪己以答天責皇祖有訓禹湯
格言朕承宗祧敢不祇服卿位上宰歷年于茲乃以譴
戒之來獨祈罷免移過於下非予所聞勉思消復之宜
毋重朕之不德所請宜不允

賜宰相呂大防等為雨水乞降黜不允詔

省所劄子奏伏見雨水過常害及民物皆由亢位無補
致此災譴伏望特賜降黜事具悉常雨為災歷時不已

雖竭精禱未蒙神休陰陽失和衆庶被害側席思咎殆
天儆予實賴左右輔臣交修不逮卿等躬任燮理志同
憂勞雖引責抗章義深懇惻而遽請避位予何倚毗惟
先格王飭已正事不聞歸罪股肱大臣當體至懷共圖
救政所請宜不允

賜蘇頌第二表乞致仕不許詔

昔衛武耄老猶聞箴儆之言方叔壯猷實繫顯允之德
卿已謙避宰席退領祠宮以時造朝精力未艾黃髮在

位重於典刑雖嘉知止之風且異尚賢之意勉綏厥服
以副眷懷所請宜不許

不允詔

輔弼之任體貌所隆進退之宜輕重攸繫卿亮采三事
施勤四方圖任舊人久勞於共政賓禮故老尚賴於咨
謀而累抗封章願還印紱於卿為美非朕所安所請宜
不允

賜資政殿學士許將免知揚州乞便鄉一郡不

許詔

卿自仁皇之末首冠多士宣力中外服在近僚向解機務出分邊寄及此歸戎改藩東南而累抗奏封懇祈鄉郡過家上冢雖懷桑梓之至情憂國忘私宜體朝廷之重委往即乃治無或故辭所請宜不許

不允詔

昔申伯于蕃用寧周室貢禹懷土終老漢廷蓋邦家唯欲得賢則人臣豈可自便卿入位丞轄出總戎麾身雖

侯方心在王室而近辭淮海遠請甌閩求之故常未有此比祇服成命以副眷懷所請宜不允

賜皇叔徐王辭免乘檐子至下馬處不允詔

省所劄子奏許乘檐子至下馬處伏望特賜免罷事具悉叔父秉德位冠宗藩入侍慈闈宜有優禮惟予沖人方以孝愛順天下其敢弗欽肩輿造朝矧有故事深執謙退當體眷懷所請宜不允

大相國寺大殿上開啓謝晴道場齋文

八月

伏以常雨為沴下民其咨祇竭精誠仰祈妙覺天地歛
氣山川收雲清風時興白日顯照爰修法會庶答慈恩

上清儲祥宮開啓謝晴道場青詞

伏以常雨為災歷時不已肅將誠懇仰叩清虛陰沴廓
消離明廻照顧惟南畝尚有西成祇案真科用昭靈貺

又朱表

迺以霖雨害及下民夙夜不寧永思愆咎輒瀝誠懇仰
籲穹昊惟神降休時暘協應顧茲寡昧曷動高明祇建

清場上答鴻施

故贈開府儀同三司駙馬都尉李瑋堂祭文

五十

日

惟靈章懿近屬仁祖副車王姬築館蚤膺選尚寵榮福
祿累紀於茲旌節在門以侯就第奄終壽考深用盡傷
特設奠筵庶昭恩禮尚饗

又下事祭文

惟靈外戚藩侯奉車帝壻四朝寵遇遂擁節旄康寧考

終奄及襄事褒贈之典視秩三公侑以奠觴慰茲幽宥
尚饗

又舉靈前一夕祭文

惟靈位為戚藩居列主第富貴壽考哀榮始終訃音初
聞趣駕臨奠葬期奄至遣使護喪既啓敢塗將及祖載
侑以肴醴慰茲營魂尚饗

太廟逐室各津漏及滴濕神帳奏告僖祖皇帝
等祝文

伏以寢廟有嚴威神所宅歲時既久風雨寢隳攸司庀工揆日祇事敢不虔告用昭孝誠尚饗

賜資政殿學士新除守戶部尚書李清臣茶藥

口宣

卿夙贊鈞衡久臨蕃屏已趨召節入長地官行涉暑塗宜綏福履特加問賚當體眷懷今差入內內侍省內東頭供奉官徐湜賜卿茶藥兼傳宣撫問想宜知悉

內外神廟開啓消災祈福道場祝文 二十三日

伏以崇慶至仁溥天共戴勤勞成疾治療未平遍歎靈
祠仰祈休應所冀祓除災疾降集福祥永庇羣生益隆
萬壽尚饗

五嶽開啓消災祈福道場青詞

伏以天祚有德神享至誠太皇太后保佑眇躬焦勞庶
政偶嬰疾未底和平是以夙夜靡遑齋明歷禱惟神
望于秩典庇此生民其克相於慈闈永綏安於壽祉

太皇太后服藥消災祈福金籙道場青詞

臣夙以眇躬嗣膺大統實賴太皇太后保育冲菲扶持
艱危歷年于茲其德惟一至靜能久大公無私天地之
所鑒知華夷之所愛戴焦勞邁疾治療未平臣冰淵戰
兢夙夜憂慄是用載涓秘殿申救輔臣案金籙之真科
祈璇穹之寶命伏冀三清教父衆聖天宗敷佑宋邦介
福文母勿藥有喜獲濟於屯災無疆惟休永綏於壽祉

又朱表

上帝景命既申錫於宋邦冲人眇躬實仰賴於文母自

總臨於庶政惟思濟於羣生無毫髮之私神天所鑒有
惻怛之愛億兆歸心久積憂勤屬嬰疾臣夕惕惟厲
啓處不遑是用請命皇穹呼窮元父仰惟福善助順
忱益謙極其難厄之虞降以康寧之吉

太皇太后服藥奏告天地宗廟社稷祝文

伏以太皇太后擁佑眇躬救寧方夏勤勞邁疾治療未
瘳心之憂危靡所底告謹擇良日請命大神伏惟昭鑒
精衷曲垂靈貺庶有感格以速和平尚饗

皇地祇云請
命大祇宗

欽定四庫全書

卷三十

廟云請命宗祊
社稷云請命于神

故贈永嘉郡夫人王氏堂祭文

二十八日

惟靈服在內庭奉循法度祇勤夙夜靡有愆違遽殞厥
身乃加追命將殯之夕送以奠觴尚饗

又墳所祭文

惟靈序職宮闈其儀令淑生有禮秩沒有恩榮遣奠敢
塗致我誠惻尚饗

延福宮穆清殿開啓上祝太皇太后消災集福

道場朱表

九月

上神孚佑降監孔昭洪造何言至誠必應顧惟眇質獲
奉丕基仰繫崇慶之仁大庇羣生之命偶乖和豫實自
勤勞是以惕厲薰心齋明滌慮告虔淨宇薦信穹昊延
集福祥祓除譴咎所冀勿藥有喜遄底康寧無疆惟休
永膺壽考

賜諸道州府告諭敕書

敕真定府官吏軍員將校僧道百姓等上天降災九月

三日大行太皇太后奄棄四海道揚遺命顧念眇躬摧毀荒迷未知所濟咨爾有衆務安厥常以副朕哀諭之意故茲告諭想宜知悉

崇慶宮開啓大行太皇太后初七水陸道場齋

文
八日

伏以功被寰區登真不返法周沙界應供無邊式陳哀薦之誠大啓等慈之會冀憑妙界仰奉靈游

皇帝為大行太皇太后成服祭告祝文

昊天降凶四海喪妣攀號罔極至痛無丈初被縗麻式
陳哀薦以今日成服不敢不告尚饗

賜文武百僚請聽政第一表不允批答

九日

昊天降禍大行太皇太后奄棄萬方朕以眇末之身嫗
嫗在疚充窮永慕未知攸為而公卿大夫遽以聽事為
請夫三年之喪方處苫廬未易縗服乃欲臨便坐見羣
臣其可得乎所請宜不允

賜文武百僚第三表請聽政不允批答

十二日

朕遭家不造早失先帝實賴太皇太后保佑眇躬勤勞
艱難于茲九載大德未報奄及升遐悼心失圖銜恤在
疚卿等乃迫以遺詔奪其哀情雖一日萬幾理難久曠
而終天至痛力未能勝母遽執於權宜庶獲專於喪紀
所請宜不允

大行太皇太后二七於崇慶宮設九幽醮青詞

十五
日

伏以慈顏永隔飈馭不留欲報之勤追攀罔極載嚴禁

宇祇建清場觀憑真聖之靈上濟仙遊之路願回昭鑒
深諒精誠

賜文武百僚請聽政第五表不允批答

昔高宗三祀亮陰不言滕文五月未有命戒朕自嬰荼
苦方此逾旬哀疚在心縗麻在體欲言國政所未忍也
而況三事大夫服勞夙夜百司庶尹率由典常官不易
方朝無廢事當少伸朕志毋奪喪焉所請宜不允

太皇太后山陵務從節儉詔

朕恭以德行太皇太后保祖宗之基命定社稷之永圖
德參二儀功冠千古憂民慘怛如肌體之有傷克已公
清無絲毫之自奉今普天喪恃四海同哀雖築陵高於
泰山備禮殫於萬物顧無以報亦未為多惟遵奉於訓
言益光昭於儉德以對在天之盛烈以揚愛物之遺仁
緣山陵非久脩奉深慮有司過有煩勞枉費人力不能
仰承遺誥務遵儉省之意其令尚書戶部斟酌轉移應
副毋得寬剩計置除京西路轉運司自合供辦其諸道

非特降母得妄有進助咨爾中外當體朕懷

大行太皇太后殿啟祭告祝文

二十一日

伏以音容永隔服御如存龜筮協從日月流速爰依正寢祇設叢宮光靈在天攀號罔極尚饗

賜文武百僚請聽政第七表俟終易月之制批

答

朕惟先王制禮稱情立文君子居喪與易寧戚以日易月斷恩從權祖宗以來亦未遑改朕外遵遺訓內服通

喪雖三年不言仰企前哲而公除聽政抑有舊章卿等
疊抗奏封備殫懇款朕承宗廟之重所不得辭強抑至
情興言推切宜勉從來請俟終易月之制委有司定日
施行

崇慶宮開啟大行太皇太后三七水陸道場齋

丈 二十二日

伏以真馭不留慈顏永遠仰憑覺力追奉靈游祗祓禁
塗大陳法會庶集無邊之福用資不測之神

大行太皇太后大祥祭告祝文

二十七日

創鉅難任終天永痛祥除奄及易月有期瞻慕几筵式
陳哀薦尚饗

十月朔資薦大行太皇太后於福聖禪院作水

陸道場齋文

伏以仙游永遠日御遄流履霜露以增哀想音容之如
在仰憑妙覺祇薦真靈恭即仁祠大陳法會庶緣勝果
用助遐升

皇帝達大行太皇太后與大遼皇帝遺留書

十月一日姪孫大宋皇帝謹致書於叔祖大遼聖文神武

金功大畧聰仁睿孝天佑皇帝

闕下

閔凶如昨荼苦至

深奉慈幄之遺言達寶鄰之永信特馳使介往致物儀
今差龍圖閣直學士左朝散大夫上護軍河東縣開國
子食邑五百戶賜紫金魚袋呂陶西京左藏庫使兼閤
門通事舍人上騎都尉太原縣開國伯食邑七百戶郝
惟立充大行太皇太后遺留禮信使副其禮物具諸別

幅專奉書不次謹白

大行太皇太后遺賜南平王李乾德衣物示諭

敕書

敕南平王乾德昊天不弔崇慶上賓迺眷海邦世修藩
職奉諱之日銜恤所均申錫遺恩仰承先旨益肩忠順
庸副誠懷今大行太皇太后遺賜卿對衣金腰帶銀絹
鞍轡馬等具如別錄至可領也

賜夏國主告諭遺留詔

詔夏國主上天降禍大行太皇太后奄棄宮朝爾自續
世邦早膺恩恤雖畫疆保塞久未訖於溝封然悔過上
章比已馳於使介仰承慈旨終軫嗣藩緬惟奉諱之辰
同切摧情之慕今差供備庫使曹譜齋賜大行太皇太
后遺留銀絹具如別錄至可領也

皇帝賀大遼皇帝正旦書

正月一日姪孫大宋皇帝謹致書於叔祖大遼聖文神
武全功大畧聰仁睿孝天佑皇帝闕下歲厯更端方春

陽之發育鄰邦繼好宜壽祉之綏將善頌所深名言曷
既今差左朝散大夫守祕書少監上護軍河東縣開國
男食邑三百戶賜紫金魚袋呂希績供備庫使上騎都
尉贊皇縣開國男食邑三百戶李昌世充正旦國信使
副有少禮物具諸別幅專奉書陳賀不次謹白

賜文武百僚請御正殿第二表不允批答

朕嗣位以來仰恃崇慶同御便殿端拱蒙成不圖閔凶
遽失慈訓哀慕恍惚謦欬如存迫於羣言勉力聽政雖

終易月之制方執三年之喪前臨正朝實所未忍興念
及此心焉若推所請宜不允

賜文武百僚請御正殿第四表不允批答

昔我仁祖神考追孝二后感格天地通於神明垂裕後
昆永錫厥類朕庶幾程式率而行之執喪致哀圖報罔
極卿等雖志在家國其亦以禮愛君俾予一人無忝祖
考所請宜不允

范太史集卷三十

欽定四庫全書

集部

范太史集卷三十一

詳校官庶吉士臣何道沖

檢討臣何思鈞覆勘

總校官進士臣楊懋珩

校對官中書臣嵇承志

謄錄監生臣李維瀛

欽定四庫全書

范太史集卷三十一

宋 范祖禹 撰

翰林詞草

崇慶宮開啓資薦大行太皇太后道場盡七齋

丈二十一日

伏以坤儀永謝日御遙流追罔極之深恩修等慈之妙
教禁塗載闢法會無遮庶憑十力之勝因上濟九天之
仙路謹言

三陵上宮并諸后位及諸王等神臺值霖雨淫
皮脫落下手添修奏告帝后表文

伏以神靈所宅陵寢載嚴風雨侵尋塗丹剝落將加完
飾罔敢輒興爰擇吉辰是用虔告

大行太皇太后山陵封山斬草動土興功祭告

五帝祝文

二十六日

恭以大行太皇太后臨朝九年嘉靖四海昊天不弔厭
代登遐山陵有期龜策獻兆爰得吉穴祔於厚陵鳩工

使徒將集大事練此時日肇興土功惟神之休降佑在下
安固真宅億萬斯年與宋無極敢用虔告尚饗

大行太皇太后山陵封山斬草奏告諸陵帝后
表

伏以先后在天崇邱卜壤練此吉日作于新宮乃興工
徒將啓兆域虔告陵寢用嚴威神謹差右朝散郎臣邢
端奉表奏告以聞

故魏王鄧國蔡國公主墳斬草破地祭告五方

帝并后土等神祝文

伏以先后山陵帝子從祔考卜幽宅圖惟永寧託神之休是用虔告尚饗

皇帝御正殿祭告大行太皇太后文

十一月

伏以日月遄流慈顏永遠夙夜哀慕不敢遑寧羣臣抗言統業至重已即便坐躬攬萬幾當臨正朝時見百辟勉從衆論增愴五情臣以今月二日御正殿不敢不告尚饗

賜資政殿學士新除知大名府許將辭免不允

詔

朕以全魏別都國之巨屏大河決溢烝民流離慘怛於心哀此鰥寡思用舊德往拊一方以卿歷典藩垣夙陪機政特輟東南之寄庶無朔易之憂當體眷懷勿為遜避所請宜不允

撫問涇原路臣僚口宣

卿汝等宣力塞垣服勞王事履茲寒律簡在予衷存問

有加眷恩斯厚今差東頭供奉官曹允則傳宣撫問想
宜知悉

諸路走馬赴闕奏覆回傳宣撫問本路臣寮口

宣

卿汝等為國蕃宣自公夙夜眷言外服簡在予衷存問
有加恩勤斯至今差西頭供奉官張彥孫傳宣撫問想
宜知悉

賜樞密直學士簽書樞密院事劉奉世辭免生

日生餽不允詔

輔翼之臣禮有慶賜茲為故事不可一日而廢也朕方銜恤而有司舉典夫何足辭所請宜不允

白溝驛賜大遼賀興龍節人使御筵口宣

卿等載馳原隰適及溝封眷言行李之勤方屬祁寒之候爰加郊勞以示寵私今差某官某賜卿等御筵兼傳宣撫問想宜知悉

趙州賜大遼賀興龍節大使茶藥詔

皇華將命瑞節在途加異品之榮頒慰祁寒之行役式
昭眷寵以助保綏今差入內內侍省內侍殿頭楊珪往
趙州賜卿茶藥具如別錄至可領也

趙州賜大遼賀興龍節副使茶藥詔

上介展儀命圭申信眷風霜之嚴洌頒薈劑之珍良慰
乃勤勞體予恩渥今差入內內侍省內侍殿頭楊珪往
趙州賜卿茶藥具如別錄至可領也

賜觀文殿大學士新差知揚州蘇頌再辭免知

揚州不允詔

朕以東南之寄淮海為重思用舊德惠綏一方與其引
逸於祠宮曷若均勞於侯服尹茲揚土以屏王家尚賴
仲山之將明庶聞衛武之箴儆所請宜不允

賜北京等路臣寮中冬衣襖口宣

卿汝等職在外服時方大冬用均安燠之恩以慰勤勞
之念欽承寵賚益體眷存今差學士院待詔段從易賜
卿汝等中冬衣襖想宜知悉

賜安武軍節度使知太原府韓縝進馬詔

省所進奉謝南郊禮畢奏薦子孫恩澤馬二匹事具悉
卿鼎槐舊老藩閫元侯因推延世之恩來效充庭之貢
眷言忠蓋良用嘆嘉

賜龍圖閣直學士知成都府蔡京進馬詔

省所進奉謝恩授龍圖閣直學士馬一匹事具悉卿輟
守雍部總麾劍川進陞內閣之華來效外閑之貢眷惟
勤蓋良用嘆嘉

趙州賜大遼賀興龍節使副茶藥口宣

卿等恭持信幣方次中途爰有恩頒以慰行役欽承眷
渥用助保綏今差入內內侍省內侍殿頭楊珪賜卿等
茶藥想宜知悉

相州賜大遼賀興龍節使副御筵口宣

卿等肅持使節來會誕辰涉厯山川少休徒御式頒燕
行用示恩私今差入內內侍省內侍殿頭關琳賜卿等
御筵想宜知悉

白溝驛賜大遼賀正旦人使御筵口宣

卿等踐修久好衝涉祁寒興言行役之勤用錫燕休之
禮體茲眷寵懋乃使華今差某官某賜卿等御筵兼傳
宣撫問想宜知悉

撫問太原府代州等路臣寮口宣

卿汝等為國蕃宣在公夙夜方冬寒烈言念勤勞當體
眷懷俾加存問今差入內侍省內東頭供奉官裴彥
臣傳宣撫問想宜知悉

崇慶宮冬至資薦大行太皇太后設醮青詞十二

三日

伏以日月遄邁霜露荐臻銜追遠之深哀感迎長之新
令載嚴禁宇大講科儀庶憑真勝之靈上濟仙遊之駕
永垂道蔭常祐寶圖無任懇禱之至

撫問接伴大遼賀正旦人使副口宣

卿等載馳華隰遠迓使旌蒙犯風霜勤勞夙夜唯宜尚
慎以副予懷今差某官某傳宣撫問想宜知悉

撫問大遼賀正旦人使口宣

卿等踐修久好來會元正川陸塗遙風霜氣烈宜勤調
護以副眷存今差某官某傳宣撫問想宜知悉

賜尚書右僕射范純仁乞除一閒局或小郡不
允詔

朕宅憂三祀深慮萬幾方倚老成共圖政治卿昔以人
望延登宰司召自輔藩復還揆路于茲未幾日竚謀猷
乃以前有小言引咎自列弼臣進退為國重輕其亟起

就位以副朕簡注之意焉所請宜不允

班荆館賜大遼賀興龍節使副到闕御筵口宣
卿等載馳華隰已次近郊少憩使旃特頒燕豆勿辭既
醉尚體至恩今差內侍省內侍殿頭孫承禧賜卿等御
筵想宜知悉

就驛賜大遼賀興龍節使副銀鈔鑼唾盂孟子
錦被褥等口宣

卿等並飭使車方休賓館備精金之用器製華錦之寢

衣慰薦良勤眷懷斯厚今差入內侍省內東頭供奉
官鄧友直賜卿等銀鈔羅唾盂孟子錦被褥等想宜知
悉

興龍節賜殿前太尉以下罷散道場香口宣

卿等翊衛竭忠誕彌均慶預嚴淨會以薦壽祺及此告
成宜加寵賚今差內侍省內侍高品衛克忠賜卿等香
想宜知悉

賜大遼賀興龍節人使朝見訖歸驛御筵口宣

卿等肅將瑞節已致慶函方適館以少休特賜筵而示寵茲為勤厚當體眷懷今差入內內侍省内侍殿頭梁隱賜卿等御筵兼差通議大夫知樞密院事上柱國韓忠彥押伴想宜知悉

興龍節賜知樞密院事以下罷散道場香口宣卿等樞機之臣社稷是衛夙設人天之供共祈箕翼之祥宜有寵頒用昭眷遇今差內侍省内侍殿頭王祺賜卿等香想宜知悉

十二月七日就驛賜大遼賀興龍節人使內中

酒果口宣

卿等命主修好信幣展儀頒禁宇之芳甘飾賓筵之燕
喜用昭殊遇當體至恩今差入內內侍省內侍殿頭康
承錫賜卿等內中酒果想宜知悉

賜大遼賀興龍節人使不射弓例物口宣

卿等並膺藝選來展使華適當徹樂之辰難舉射侯之
禮特加賚予以示眷勤今差入內內侍省內侍殿頭羅

宿賜卿等射弓例物想宜知悉

就驛賜大遼賀興龍節人使不宴御筵口宣

卿等夙駕星輶來趨壽節屬在遏音之旦莫伸折俎之儀就錫燕私用昭寵遇今差入內內侍省內侍殿頭羅宿賜卿等御筵兼差樞密直學士中大夫簽書樞密院事劉奉世押伴想宜知悉

興龍節賜徐王罷散道場香口宣

惟我叔父作藩王家饌蒲塞於祗園祝椿齡於誕日既

成法會宜有寵頒今差內侍省內侍黃門王備賜卿香
想宜知悉

賜大遼賀興龍節人使朝辭訖歸驛御筵口宣
卿等聘儀已事辭謁言歸少留舍館之安特賜賓筵之
寵用將誠意以慰勤勞今差入內內侍省內侍殿頭王
佐賜卿等御筵魚差大中大夫守門下侍郎蘇轍押伴
想宜知悉

班荆館賜大遼賀興龍節人使回程酒果口宣

卿等抗旌歸路脂轄近郊念川陸之阻修眷永霜之嚴
烈特頒芳旨用示恩私今差內侍省內西頭供奉官張
翬賜卿等酒果想宜知悉

太廟添修石室奏告僖祖宣祖太祖太宗真宗

仁宗神宗皇帝祝文

十二月

於穆清廟列聖在天思齊太任皇祖合食神宮有恤石
室肇修虔遵舊章不敢不告尚饗

太廟奏告英宗皇帝祝文

伏以祔陵涓日配主有期增廣祖筵奉嚴廟室儔功經始祗率舊章昭鑒在天不敢不告尚饗

瀛州賜大遼賀興龍節人使回程御筵口宣

卿等聘事告成還車言邁改轅北道弭節近關眷言行役之勤宜有燕私之寵今差內侍省內侍殿頭蔣維恭賜卿等御筵想宜知悉

雄州賜大遼賀興龍節人使却回御筵口宣

卿等徒御旋歸山川悠緬雖不遑於啓處諒無爽於保

頤特錫燕休仍加問勞今差內侍省內侍殿頭孫承禧
賜卿等御筵想宜知悉

趙州賜大遼賀正旦大使茶藥詔

歲厯更端使輶講好眷星霜之夙駕有薈劑之榮頒綏
乃冲和副茲優渥今差入內內侍省內侍殿頭馮說往
趙州賜卿茶藥具如別錄至可領也

趙州賜大遼賀正旦副使茶藥詔

使華將命介紹展儀眷言行役之勤宜有恩頒之厚尚

綏乃履以副予懷今差入內侍省內侍殿頭馮說往
趙州賜卿茶藥具如別錄至可領也

班荆館賜大遼弔慰人使到闕御筵口宣

卿等夙馳星駕來會喪期已次近郊少休賓館特頒燕
勞當體誠懷今差內侍省內西頭供奉官石琦賜卿等
御筵想宜知悉

班荆館賜大遼皇帝祭奠人使酒果口宣

卿等載馳原隰來奠宮朝密邇都城少休郊館特加頒

費用示眷存今差內侍省內西頭供奉官李世長賜卿
等酒果想宜知悉

班荆館賜大遼祭奠人使到闕御筵口宣

卿等肅馳使傳來奠皇儀近望國門少休郊館宜頒燕
犒用示寵私今差內侍省內侍殿頭孫承禧賜卿等御
筵想宜知悉

雄州賜大遼弔慰人使回程御筵口宣

卿等奉將使指來展弔儀載整歸驂已臨邊圉宜頒燕

勞用示寵私今差內侍省內侍殿頭王懷敏賜卿等御筵想宜知悉

接伴大遼弔慰人使送伴回程沿路與賀大遼

正旦使副回相逢傳宣撫問口宣

卿等持節出疆抗旌復命蒙犯霜露跋履山川言念勤勞俾加存問今差某官某傳宣撫問想宜知悉

接伴大遼弔慰人使送伴回程沿路與大遼賀

正旦人使相逢傳宣撫問口宣

卿等輜軒將命瑞節講儀蒙犯風霜馳驅原隰俾伸問
勞當體眷懷今差某官某傳宣撫問想宜知悉

趙州賜大遼賀正旦使副茶藥口宣

卿等並驅星駕載涉冰塗乃眷勤勞特加賚予宜膺寵
渥用助綏將今差入內內侍省內侍殿頭馮說賜卿等
茶藥想宜知悉

相州賜大遼賀正旦人使赴闕御筵口宣

卿等抗旌遠道弭節近藩少留舍館之安宜有肆筵之

寵用昭眷渥以慰勤勞今差入內內侍省內侍殿頭王
端賜卿等御筵想宜知悉

班荆館賜大遼賀正旦使副到闕酒果口宣

卿等驂駢夙駕來修上日之儀醴實時珍往致近郊之
勞茲為勤厚當體眷存今差內侍省內西頭供奉官李
世長賜卿等酒果想宜知悉

班荆館賜大遼賀正旦使副到闕御筵口宣

卿等馳驅川陸蒙犯風霜近望都城少休郊館式頒燕

衍用示恩私今差內侍省內侍殿頭王祺賜卿等御筵
想宜知悉

賜大遼賀正旦使副生餽口宣

卿等肅持華節已奉信書方賓館之賜休俾行人之致
餽茲為加勞當體渥恩今差入內內侍省內侍殿頭馮
說賜卿等生餽想宜知悉

大行太皇太后諡號冊寶奏告天地景靈宮等

處青詞祝文 二十四日

伏以議行誅功請於宗廟尊名節惠質之神天乃勒鴻
休奉薦寶冊恭舉舊典以今月二十六日上大行太皇
太后尊謚曰宣仁聖烈皇后不敢不告尚饗

大行太皇太后謚號冊寶奏告宗廟社稷祝文
伏以姜任之功社稷是賴受謚於廟配祖在天乃勒鴻
名奉薦寶冊虔遵舊典以今月某日上大行太皇太后
尊謚曰云云

景靈宮奉安太皇太后神御詔

朕惟神宗皇帝大新館御追孝祖宗合原廟之辟容萃
景靈之吉壤大行太皇太后每思克已唯務恤民特於
元佑之初預敕永終之制避神皇之宣寢從英祖於治
隆仁愛之深與天無極謙光之美振古未聞今將先遠
橋山升祔宗祏載嚴像設以奉神游敢祇率於訓言用
述成於聖志咨爾中外當體朕懷將來景靈宮奉安大
行太皇太后神御衣元祐元年正月二十六日手詔施
行

撫問脩奉官姚麟以下口宣

卿等營奉先寢時方大冬蒙犯雪霜勤勞夙夜眷言忠
力深軫朕懷臨遣使人往伸存問今差入內侍省內
東頭供奉官許日傳宣撫問想宜知悉

賜尚書右僕射范純仁辭免弟純禮樞密都承
旨不允詔

省所劄子奏辭免弟純禮樞密都承旨伏望特除在京
一閒慢差遣事具悉古者盛治之世惟才是用父子兄

弟並列於朝苟存至公不事形跡朕方仰成宰輔推委
誠心庶幾君臣不愧古昔純禮承宣樞幄於卿夫復何
言載覽來章非予所望勿為疑慮當體眷懷所請宜不
允

賜新除尚書吏部侍郎王欽臣辭免不允詔

天官亞卿古之小宰攝職而授圖惟得人卿以文雅自
將歷更省部已試之效僉曰汝諧疇其久勞寵以真秩
往服成命母庸遜辭所請宜不允

賜新除戶部侍郎王覲辭免不允詔

朕以六卿之貳難於用人故攝職而授以圖其效考實而進以勸其能卿歷踐臺省嘗參侍從頃由憲部暫處地官僉言汝諧寵以真秩往服成命勿為謙詞所請宜不允

賜禮部侍郎孔武仲乞江淮一郡不允詔

卿以履行文學為時名儒剛毅近仁質直好義春官之貳邦禮是司宜在朝廷時聞議論迺引微疾遽求外補

非所望也姑安厥位以副眷懷所請宜不允

范太史集卷三十一

欽定四庫全書

范太史集卷三十二

宋 范祖禹 撰

翰林詞草

崇慶宮為大行太皇太后正旦設水陸道場齋

丈 九年

伏以飈馭賓天望珠襦而永遠星杓紀歲驚玉厯之更
新履濡露以推心依真乘而追福崇嚴清供蠲潔至誠
仰祈妙覺之慈升濟仙游之路謹言

賜大遼賀正旦使副正月一日慰畢就驛御筵

口宣

卿等踐脩久好來會元正已將命於外朝宜肆筵於公館昭予眷厚慰乃忠勤今差某官某賜卿等御筵兼差某官某押伴想宜知悉

賜大遼賀正旦使副正月一日慰畢就驛酒果

口宣

卿等展幣執圭已勤使事盈樽實篚加錫時珍用示誠

懷茲為春禮今差某官某賜卿等酒果想宜知悉

正月五日賜不宴御筵口宣

卿等青陽肇節華隰講儀適當撤樂之辰就錫示慈之燕勿辭既醉當體至恩今差某官某賜卿等御筵兼差某官某押伴想宜知悉

正月五日賜不宴酒果口宣

卿等驂駢在館不忘啓處之勤觴豆燕賓爰有芳甘之錫式將厚意宜服渥恩今差某官某賜卿等酒果想宜

知悉

六日就驛賜大遼賀正旦使副朝辭訖御筵口

宣

卿等來修聘事已上謁辭惟信宿之少留將旋歸而言
適宜頒燕衍用示恩勤今差某官某賜卿等御筵兼差
某官某押伴想宜知悉

賜朝辭訖歸驛酒果口宣

卿等奉辭文陛歸整華驂宜無置醴之優宜有加籩之

厚特頒芳旨用助燕私今差某官某賜卿等酒果想宜
知悉

相州賜大遼賀正旦使副回程御筵口宣

卿等抗旌歸路弭節近藩涉卉木之載榮念山川之云
遠宜頒飲御以慰賓勞今差某官某賜卿等御筵想宜
知悉

瀛洲賜大遼賀正旦使副回程御筵口宣

卿等聘圭復命使節闕關眷言行役之勤用錫燕私之

厚少留歸馭當醉湛恩今差某官某賜卿等御筵想宜
知悉

皇帝回大遼賀正旦書

正月

闕

日姪孫大宋皇帝謹致書於叔祖大遼聖文神

武全功大畧聰仁睿孝天祐皇帝闕下歲厯更端導春
陽之發育鄰邦繼好馳使乘以皇華厚幣展儀信書致
問永惟歆睦第切感悰今泰州觀察使蕭禮等回謹奉
書陳謝不次謹白

賜五臺山十寺僧正省奇等進奉功德疏獎諭

敕書

省所進奉興龍節并新正功德疏事具悉誕辰頌壽元
歲祈祥誠修禁苑之儀疏上彤廷之貢覽其勤惓良用
嘆嘉今賜省奇等紫僧衣一對絹二十疋故茲獎諭想
宜知悉

賜知樞密院事韓忠彥乞降黜不允詔

朕聞先王作罰兄弟無相及之罪嘉彥之責卿何所疑

當體至懷復于而位所請宜不允

賜知樞密院事韓忠彥待罪不允批答

卿元勲之後登翊近樞歷年于茲一節匪懈嘉彥以卿同氣為國懿親戚實自貽罪無相及抗章引咎深用憮然當體眷懷勉綏厥位所請宜不允

賜尚書右丞鄭雍生日詔

日底營室月維孟春篤生良臣作我右輔用錫爾祉俾壽而臧今賜卿生日羊酒米麪等具如別錄至可領也

故蔡國長公主奉先禪院啓攢於攢堂前開啓
資薦道場齋文

伏以娥皇慧質夙為降渚之游善逝法身普現隨方之
應爰因啓寔追薦往生覲憑妙覺之慈永濟超升之路
謹言

故魏王拆攢祭文

維元祐九年歲次甲戌正月癸酉朔十日壬午皇帝遣
其官某致祭于故魏王之靈維靈英宗愛子神考友弟

惟予李父敢忘尊禮龜筮言吉敢塗告啓心焉孔疚侑以肴醴尚饗

故魏王興靈前一夕夜祭文

先后上賓賢王從祔祖宗之原輦洛之路靈輶嚴駕卹典告具致此遣奠展予誠素尚饗

故魏王大葬前一夕夜祭文

惟靈秉德宗藩夾輔帝室自我不見于今七年從祔原陵即安宅兆遠日之夕饋奠有儀尚饗

故魏王下事祭文

昔周成王追念叔父俾其子孫世祀于魯在漢章帝感
思東平處存人亡哀不勝情今予季父永歸窀穸奠以
送之義兼古昔尚饗

故鄧國蔡國長公主拆攢祭文

惟靈寶婺儲精璿源毓慶降年不永卜日有期爰啓敢
塗將歸宅兆侑以奠禮展予至情尚饗

故鄧國蔡國長公主興靈前一夕夜祭文

惟靈淑質幼成穠華夙隕將從先后往祔西陵明發啓
行奠觴以訣尚饗

故鄧國蔡國長公主大葬前一夕夜祭文

惟靈王姬之美未成肅雖帝妹之貴永違元吉厚陵從
祔日月告期爰稽舊章是用尹祭尚饗

故鄧國蔡國長公主下事祭文

金粟之原神皇是宅蒼梧之野帝子所遊永閟幽宮酌
觴告訣尚饗

故貴妃苗氏充儀陳氏折攢祭文

爰命太史考卜吉辰乃啓葢塗即安宅兆式陳饋奠以
示哀榮尚饗

故貴妃苗氏充儀陳氏下事前一日祭文

六月

遠日惟良卹典告備將以明發適於幽宮魂而有知歆
此遣奠尚饗

故貴妃苗氏充儀陳氏下事祭文

七月

爰備禮儀厚終襄事載寧體魄永固萬年醑此奠觴惟

以妥侑尚饗

崇慶殿開啓大行太皇太后發引前二日道場

齋文

伏以慈顏永遠真馭不留大事請期西階啓殯仰憑覺
力追奉靈游涓祓禁塗祇陳法會庶集無邊之妙善以
資不測之至神謹言

大行太皇太后靈駕發引皇太后日奉起居表

正月十七日

龍輶取道鳳翥戒行萬旅畢從百神來護恭惟大行太
皇太后厚德載物至仁代天正座臨朝已致九年之治
佳城卜兆遽臨七月之期攀慕無從哀摧罔極

十八日

幽宮協吉已占龜洛之都靈駕祖行寢遠鳳城之地恭
惟大行太皇太后憂勤祖業燕翼孫謀成化始基方詠
周詩之雅流陰易度忍聞楚挽之悲引望光靈第深悲
隕

十九日

路指漢陵已隔旌旗之望風回魏闕空聞笳吹之聲恭
惟大行太皇太后德參二儀功冠千古聖如文母實隆
周室之基化若華胥俄返軒臺之馭追攀何及隕涕無
窮

二十日

金旌風轉畫筵星陳想六列之徐驅度三川而益遠恭
惟大行太皇太后接統千載臨朝九年日月之照無私

乾坤之功不有方專美于彤史遽上賓于白雲緬想行
輿尚陳哀牘

二十一日

晚日深沈掩衣冠於東殿春風慘愴咽簫鼓於西畿恭
惟大行太皇太后德茂塗革功高任姒神罔恫怨家用
平康每懷勤政之憂未盡恤民之樂想安神駕惟極哀
悰

二十二日

輜車夙駕縞駟宵征悼日月之難居望山川之易遠恭
惟大行太皇太后儉追太古誠感至神瑞滿寰中俄列
羽仙之馭澤流方外豈惟椒殿之悲瞻想光靈益增悲
涕

二十三日

秘殿垂帷尚想衣紳之侍靈輿載路莫諧羽衛之陪恭
惟大行太皇太后知下勤勞躋民仁壽懷卷耳之深念
有比屋之可封方隆正始之基遽起送終之禮違離寢

久推殞無深

二十四日

六綽在塗正遙北闕八神陪扈將次西陵恭惟大行太
皇太后天覆無私坤載至靜慈容可想悲深瀝水之涯
真馭莫回望極嵩峰之表尚馳哀訴莫盡孝思

二十五日

黼帷玉座奄棄東朝縞駟金車已臨西洛恭惟大行太
皇太后作配英祖載誕神宗象耕鳥耘將祔蒼梧之野

龍盤鳳翥永從金粟之原瞻望無窮悲號何極

大行太皇太后靈駕至陵所未掩壙已前皇太
后日奉起居表

二十六日

日月遄邁山川正遙緬惟車駕之行少駐寢陵之地恭
惟大行太皇太后疇咨前代啓迪後人神器既安遽返
賓天之御幽堂未掩猶瞻儼極之輝即遠難攀馳誠曷
既

二十七日

挽紼駐行屬車解馭已就因山之制將申揜隧之儀恭
惟大行太皇太后德配姜任仁行堯舜始被六宮之教
遠繼國風終流四表之光實增帝典尚馳誠悃少述哀
悰

二十八日

自違祖載已即壽原雖亡道路之虞第結几筵之戀恭
惟大行太皇太后公恕統下法令合人攀號非特於六

宮哀慕實同於萬國興言推愴豈易敷陳

二十九日

去景易流悵金車之至止違顏已遠瞻玉座以如存恭
惟大行太皇太后治國以家視民如子時臻奠枕方同
萬國之歡禮就因山遽起九原之恨將臨引窆第切推
心

三十日

神明所宅扈蹕固嚴倏驚晦朔之更愈結晨昏之慕恭

惟大行太皇太后博施濟衆不廢困窮發政施仁必先
鰥寡宜享恤民之樂遽臨復土之期緬想無窮哀號罔
極

二月一日

桃華肇節邊鮪薦新將臨引竈之期彌切對時之感恭
惟大行太皇太后仁被草木信及豚魚動植何知自遂
勾萌之理音容永隔惟深哀疚之懷瞻望如疑誦言曷
既

二日

厚陵木拱正瞻儼極之儀慈殿雲垂尚想問安之禮恭
惟大行太皇太后顙俊尊帝養賢及民永隆千載之基
奄棄萬方之養將臨成壙第切推心

三日

宮陵在望月律更端屬歲事於橋山第纏哀於彤禁恭
惟大行太皇太后體坤持載並日照臨盛治難名方受
宜民之福流陰易失遽臨襄事之期攀嚮無從悲推何

已

四日

天序密移春陽載淑將畢送終之禮莫申報本之誠恭
惟大行太皇太后圖治憂勤檢身恭儉疎繒大練化已
被於宮闈丹旒素帷悲莫陪於陵寢興言追慕豈易名
言

五日

諏辰協吉復土有期正纏同軌之哀愈切中闈之慕恭

惟大行太皇太后明並日月德合乾坤朝無險詖之私
壽有憂勤之損永違大養罔極哀悰

六日

雲遶橋陵遽就因山之制星陳羽葆將臨成壙之期恭
惟大行太皇太后逮事仁皇嗣音慈后增光洪業率由
舊章方措世於泰寧遽興悲於先遠追攀何及隕涕無
從

七日

宮禁纏哀已極違顏之恨寢陵歲事遽當掩隧之辰恭
惟大行太皇太后脩已安人對時育物珠襦永閼與厚
地以皆安蘭殿增悲悵昊天之恩極尚申省問罔喻哀
恫

大行太皇太后神帛回程皇太后日奉起居表
本

八日

皇堂云揜絳闕初成屬祫事之戒期回祥車而載路恭

惟宣仁聖烈太皇太后治登九載仁覆羣生龍馭上賓
悼厥衣之永祕玉容如在佇黼座以來寧瞻望尚遙悲
摧無喻

九日

大暮無晨莫展寢門之問青陽在候言瞻吉仗之回恭
惟宣仁聖烈太皇太后擁佑聖孫奉答天命乾儀既判
難名太極之功雨澤既施莫見還雲之跡反虞將至哀
牘奚殫

十日

因山云畢載主以歸欽承六翟之來已次一圻之近恭
惟宣仁聖烈太皇太后以思齊之德垂燕翼之謀真馭
既安永隔壽原之遠慈容可想少安祕殿之嚴惟劇哀
恫尚祈降鑒

十一日

九虞將至萬旅畢還望悠遠於漢陵瞻光華於魏闕恭
惟宣仁聖烈太皇太后功流社稷德洽民人故物尚存

永結中闈之慕神游如在將升清廟之嚴哀戀徘徊精爽飛越

永厚陵下宮告遷奉安英宗皇帝并大行太皇

太后御容道場齋文

伏以聖德在天攀號罔極佛乘應物微妙難思涓袂闕庭具嚴法會覲憑神貺升濟靈游謹言

大行太皇太后陵所前一日夜祭奠祝文

龜策協從禮儀既備將以明發遷坐新宮瞻望哀號終

天罔極尚饗

大行太皇太后陵所遷奠祝文


伏以真馭在天壽原卜宅揆此吉日適於英祖惟哀顯相敬用吉遷尚饗

永厚陵上宮開啓大行太皇太后掩皇堂道場

齋文

伏以金粟壽原徽音永閼玉毫光相慧力長存即蒼野之陵宮啓祇園之法會庶憑妙善少答慈恩升濟靈游

頓超覺路謹言



范太史集卷三十二

欽定四庫全書

集部

范太史集卷三十三
四

詳校官庶吉士臣何道沖

檢討臣何思鈞覆勘

總校官進士臣楊懋珩

校對官中書臣嵇承志

謄錄監生臣李維瀛

欽定四庫全書

范太史集卷三十三

宋 范祖禹 撰

翰林詞草

樂語附

大行太皇太后山陵掩皇堂祭奠祝文

九年二月七日

八荒同軌虔奉大事敬卜茲日將掩幽宮復土戒期終
天水慕尚饗

皇后謝賜御筵表本

妾言伏蒙聖恩特賜御筵者先后賓天壽原復土八荒

同軌萬旅獻功仰聖孝之感通獲神休之佑助屬當陪
扈莫展勤勞曲頒燕搞之私祇荷惠慈之厚顧無少補
深切愧懷

皇后謝皇太后賜茶藥及傳宣撫問表本

妾言某人至伏蒙聖慈特賜妾茶若干藥若干及傳宣
撫問者西陵先遠屬當扈駕之行長樂問安實切違顏
之戀睿懷所軫慈訓曲加仍頒茗劑之珍以慰道塗之
念欽承撫諭仰戴恩私

皇后謝皇帝傳宣撫問表本

妾言某人至伏蒙聖恩傳宣撫問者寢陵脩祔莫展於
勤勞道路安行屬當於陪扈荷睿懷之仁厚頒溫詔以
丁寧仰戴恩私益深感惻

皇后謝皇太后傳宣撫問表本

妾言某人至伏蒙聖慈傳宣撫問者祇扈靈輿敢憚勤
於次舍近違禁掖徒結戀於晨昏特軫慈仁曲加勞問
仰荷寵綏之眷彌深感惻之情

皇后謝皇太妃問候牋本

妾言某人至特賜問候者祇危靈輒慙違禁閤上體聖神之仁孝居忘道路之馳驅持軫溫慈曲加勞問仰眷存之至厚懷感惻以增深

皇后謝皇太妃送茶藥牋本

祇護行輶敢憚勤於道路慙違中禁實結戀於晨昏上軫慈懷遠傳溫旨屬春陽之在候頒珍劑以養和戴荷所深名言罔既

大行太皇太后山陵下事掩皇堂訖於隧道陵
治地為方壇上設五方五帝神位座鎮謝墓

法祝文

伏以因山制禮爰始鳩功復土告成迄終大事惟神敷
佑于役罔難祗被精誠肅陳明薦尚祈來顧申錫永寧
尚饗

大行太皇太后山陵掩皇堂訖九虞祭祝文第

一七日

伏以光靈在天體魄降地惟哀顯相夙夜不寧虔遵典
禮祇薦禋事謹以制幣柔毛剛鬣明粢鄉合鄉其嘉蔬
嘉薦醴齊哀薦禋事尚饗

第二 八日

伏以送形而往既襄大事迎精而返惟極孝思敬以柔
日哀薦虞事

第三 九日

伏以其返如疑若有求而弗得以虞易奠惟至痛之無

窮明薦吉蠲神保是格

第四 十日

伏以真馭賓天主車在道日脩虞事于以寧神瞻慕哀
恫罔有終極

第五 十一日

伏以成壙而虞日接於祔翟車近止將次都畿嘉薦普
淖惟以爰侑

賜山陵使呂大防茶藥兼傳宣撫問詔

敕大防先后在天新宮復土惟時冢相總率羣司卹典
備成還車載道服勞大事興念不忘宜有匪頒用昭眷
禮今差使臣沿路賜卿茶藥具如別錄至可領也

賜徐王高密郡王宗晟安定郡王世準觀察使
仲先世雄仲當仲損仲覽團練使孝騫茶藥
詔敕書

敕徐王躬侍靈輜徂安吉寔哀恫罔極行役載勤宜有
匪頒用昭親睦

賜駙馬郭獻卿錢景臻王師約張敦禮曹詩王
詵韓嘉彥都大管勾張茂則防禦使呂真刺
史孟在光祿卿韓宗師衛尉卿趙令鑠少府
監陳絃內侍省都知劉有方茶藥詔敕書
敕師約肅護靈輜奄終吉寔屬陽和之紀月祇行役以
在塗宜有匪頒用昭眷渥

賜禮儀使李清臣鹵簿使胡宗愈儀仗使李之
純橋道使錢勰茶藥詔

敕清臣躬護靈游奄終吉寔眷使車之勤役陪虞輅以
言旋宜有匪頒以為慰勞

賜山陵諸司使副右司郎中承議郎以上內殿
承制崇班通直郎入內供奉官陳衍等茶藥
并傳宣撫問敕書

敕吳靖方因山修祔復土告成乃眷臣工服勞夙夜特
加頒賚以示恩私今差使臣沿路賜汝臘面茶七斤縛
子茶七斤藥物一銀合合重三十兩至可領也

賜知河南府安燾茶藥詔

敕安燾因山歲事復土畢功眷密幄之舊臣守別都之
留鑰典司陵邑陪扈輜輿宜有匪頒以慰勤勩

西路祔葬皇親賜故魏王新婦譚國夫人王氏
以下茶藥并傳宣撫問詔敕書

敕故魏王新婦譚國夫人王氏躬護靈輿往安吉窀穸屬
陽和之紀月銜哀疚以在塗持有寵頒用昭眷禮今差
使臣沿路賜茶藥具如別錄至可領也

賜感德軍節度使同知大宗正事兼西路祔葬
敦睦宗室宗景以下茶藥詔

敕宗景以下喪期先遠祔禮告成時屬暄和眷惟勤勩
特加珍錫用示渥恩今差使臣沿路各賜卿等茶藥具
如別錄至可領也

賜西路祔葬皇親監護葬使左朝散大夫守太
常少卿盛陶以下并祔葬魏王鄧國蔡國長
公主管勾等使臣茶藥并沿路傳宣撫問敕

書

敕盛陶以下肅駕使轡躬臨原兆涉塗良苦庀事尤勤
宜推勞賜之恩用示眷存之意今差使臣沿路賜汝臘
面茶五斤縛子茶五斤藥物一銀合合重二十兩內衬
葬鄧國蔡國長公主允弼新婦等管勾列端張禹偁竇
鐸脩墳宋良臣諸司張祐各賜臘面茶二斤縛子茶二
斤藥物一銀合合重一十兩沿路香火張師逸李綬并
祔葬故魏王沿路香火續燾各賜臘面茶一斤縛子茶

一斤藥物一銀合合重五兩至可領也

賜西路祔葬皇親敦睦宗室感德軍節度使同

判大宗正事宗景以下并監護葬使左朝散

大夫太常少卿盛陶以下茶藥口宣

有敕卿汝等爰協吉期克襄大事陽和在候夙夜良勤
宜有匪頒以為慰勞今差入內內侍省內西頭供奉官
劉友端賜卿汝等茶藥兼傳宣撫問想宜知悉

虞主回京雙調四曲

導引一曲

思齊太后盛德對皇天演寶祚千年卿雲復旦治功全
厭人世登仙龍輿忽掩三川綵仗屬車旋維清象舞告
英宣入詩頌歌絃

六州一曲

太平功擁佑帝堯聰歌九德偃五戎寰海被祥風車書
萬里文軌同自南北西東耕田鑿井戲垂髫華髮躋仁
壽域變時雍大明方天中棄養東朝苦忽忽玉座如存

永隔慈容恨難窮
崇慶空飈輪仙馭無蹤
超宇宙駕雲龍
祿翟掩軒宮栢城王氣長鬱葱
溫洛照寒崧光靈在上
徽音流千古昭如日月麗層穹
太任家邦隆彤史青編永垂鴻
清廟笙鏞奏假欽崇

十二時一曲

轉招搖厚陵迴望雙闕起
宮堯曉日麗譙金爵上干霄
風雨闌夜宮閉不重朝
奉鸞鑣漸遙玉京知何處飛英銜
恤亂絮纏悲春路迢迢縹緲哀音發
龍笳鳳簫光景同

慘澹度巖邑指河橋馬蕭蕭絡繹呈軺拂天容衛江海
上寒潮萬國魂銷追昔御東朝開鈿扇垂珠箔侍璫貂
寶香燒散飄手開仁壽域神孫高拱崑崙渤澥玉燭方
調一旦宮車晚旋歸次寥九載初如夢次功得瓊瑤

虞神歌一曲

駕玉龍設初虞祭終前旌舉天回洛水路轉崧峯瞻寥
廓煙霏沖融杳無蹤震地鼓吹悲雄誰何羽衛重拂雲
旗幟眩青紅來漸來清塵灑道脩職百神恭回首蒼茫

霧雨吹風掩泉宮

闕

衆畿入山

川改容鼓鐘臨近次十官望拜涕淚衡從人如堵晨光
葱朧闕穹隆馳道禁水相通當年遊幸空皇儀事畢泣
重瞳哀未窮巍巍餘烈輝映簡編中億萬斯年覆載同功
虞主祔廟日中呂導引一曲

延和幄座臨御九年中往事已成空皇基固覆盂四海
本自太任功九虞初畢下西宮廟祔與天宗周家盛卜
年卜世萬祀永無窮

撫問廊延路臣寮口宣

卿汝等夙以材能並膺選寄外勤邊要久效官成式厚
眷存俾加勞問今差入內內侍省內東頭供奉官陳嘉
言傳宣撫問想宜知悉

賜新除寶文閣直學士知成都府韓宗道辭免
不允詔

朕惟金蜀之寄實難其人卿以才猷歷位省府矧乃祖
叔父世守西南卿在先朝亦嘗奉使于茲三世出牧一

方必能宣布中和惠綏遠俗則朕無西顧之慮豈不休哉褒加寵名厥惟常典其趣祇命無或固辭所請宜不允

賜資政殿學士守吏部尚書胡宗愈辭免兼侍

讀不允詔

朕邇英訪道十年于茲方當博延儒臣總覽載籍卿純誠懿學直諒有餘進讀于前渴聞嘉論勉膺新命無或重辭所請宜不允

徐王改封冀王制

周尊公旦倚為四輔之師漢重王蒼位處三公之上及
我仁祖加禮荆王顧惟冲人敢後叔父誕敷明命播告
治廷皇叔永興鳳翔等軍節度管内觀察處置等使守
太尉開府儀同三司雍州牧兼鳳翔牧上柱國徐王食
邑一萬四千五百戶食實封四千九百戶賜詔書不名
顯稟訓英皇同氣神考仁義根於天性孝友冠於人倫
昔在先朝蚤膺異數迨宣后九年之政無愛子一豪之

私追惟崇慶之功固極昊天之報方畢太宮之祔饗莫先尊屬之褒嘉是用登拜師垣仍聯使節徹彼徐土受

闕

冀方內獎皇家外綏侯服進陪多賦衍食真封於戲並建親賢實為社稷之衛益強藩屏用承祖考之休往膺典冊之光永介壽祺之祉武昭令德無愧前人可特授守太師依前開府儀同三司雍州牧兼鳳翔牧賜詔書不名充永興鳳翔等軍節度管內觀察處置等使改封冀王加食邑實封

賜新除守太師冀王劄子奏辭免不允詔

敕冀王省所劄子奏辭免恩命事具悉朕永懷先后圖報無窮地近屬尊莫如叔父宜有異數以先列藩遽攬奏封力形謙避雖深嘉嘆難徇懇誠所請宜不允

賜冀王再上劄子辭免不允詔

朕以上公錫命莫若帝師之尊北土啓封莫如冀國之大非予叔父孰冠宗藩其勉欽承勿庸遜避所請宜不允

閤門賜冀王告口宣

卿親賢莫二屏翰所尊進秩帝師改封王國其承寵典以副眷懷今賜卿告想宜知悉

賜冀王三上劄子奏辭免不允詔

卿秉德謙沖神明所相為善最樂宜得仁者之壽損疾有喜當聞勿藥之瘳褒崇懿親茲率舊典朕命不易其可以辭所請宜不允

賜安武軍節度使河東經畧安撫使兼知太原

府韓鎮再上表并劄子奏陳乞致仕不允詔卿出入將相勤勞四朝古之大夫有不得謝況於股肱之舊方膺蕃屏之寄志氣克壯卧護有餘宜深體於眷懷其無拘於禮制請宜不允

賜永興鳳翔等軍官吏等示諭敕書

敕永興軍官吏軍人僧道百姓等朕以顓地親叔父位冠宗盟追惟丈母之深慈乃眷賢王之令德方畢升祔宜先寵褒進秩維師增榮舊鎮大啓冀土永為宋藩想

聞渙號之頒益洽周邦之喜今特授顥守太師依前開
府儀同三司雍州牧鳳翔牧賜詔書不名充永興鳳翔
等軍節度管内觀察處置等使改封冀王加食邑七百
戶食實封三百戶勲如故故茲示諭想宜知悉將士等
各得平安好參佐官吏僧道耆壽百姓等並存問之遣
書指不多及

冀王顥布政牒

應永興軍管内官吏軍人僧道百姓等茲者奉膺制命

進位公師無改旌麾更分茅社奄受冀土作蕃皇家顧
有列於內朝莫獲臨於賜履惟茲多政厥有故常爰咨
文武之良深體聖神之寄務農重本先教後刑實倉廩
以賑貧窮修戎兵以遏寇虐庶成仁壽之俗上寬宵旰
之憂將校在和緇黃式化道雖云遠心不謂遐諸有尊
親亦附存問

改元御札

朕荷皇穹之眷命守列聖之丕基十年于茲四海用人

日聽外朝之治躬勤萬物之微眇若涉淵未知所濟顧
念祇承上帝誕保受民惟駿惠於先猷以績隆於下武
乃稽仁祖之成憲思大文考之烈光其因盛夏之辰載
新元統之號庶導迎於景貺用敷錫於羣黎宜改元祐
九年為紹聖元年布告多方咸體朕意故茲札示想宜
知悉

坤成節教坊致語 八年

臣聞後天申祝已稱內殿之觴湛露示恩爰有外朝之

燕使幣致北鄰之聘星躔開南極之祥會芾充庭慶千
載潤希之遇舞童成侑奉一時交際之歡恭惟皇帝陞
下膺受正符統臨神器昭哉嗣服承六聖之鴻休大矣孝
熙盡三宮之至養恭惟太皇太后陛下執思齊之道御
假樂之時用楫濟川始仰成於傳說斷鼃立極俄追配
於媯皇天地得以清寧草木遂其零茂食既充於四輔
歌亦備於九功肆及誕辰具陳樂闋童冠紫袴稍依慶
善之丈容寶鑑露囊盡斥開元之侈事臣猥居法部叨

隸奉常冒瀆天聰敢獻口號

口號

綵仗含風縹緲間神孫當宇燕千官太陰入夢祥初發
中嶽聞呼老更難諸夏豐年生詔令兩儀和氣入吹彈
下臣拜獻坤成樂長奉千秋萬歲歡

勾合曲

賓筵初秩觴行露酌之醇樂節克諧技奏鈞天之妙雲
龍在望魚藻恃時上奉宸歡教坊合曲

勾小兒隊

御香成蓋宮漏穿花霓裳羽衣方聽妙音之舉瑤環瑜珥忽逢稚子之遊申以宮商教坊小兒入隊

隊名

浴沂童子詠獻壽老人星

問小兒

悸帶並趨抗霓旌而布武髣髴相顧應畫鼓以分行宜
露悃誠雍容敷奏

小兒致語

臣聞南北通觀必有豆觴之盛君臣飾喜亦資磬管之和矧千秋載誕之期當萬寶惟成之始所以命大師而奏雅延百辟以醞醇恭惟皇帝陛下至道生知英能天縱日御金華而講藝間臨璧水以崇儒奠玉郊丘獲神祇之昭答薦桃祖廟蒙祖考之歆安遊幸闕然會朝勤止辰不動而星拱天何言而物生遂追釗誦之隆皆自姜任之訓乃修故事以樂嘉時臣等猥以弱齡值茲華旦

躬緣薄技旅進廣除未敢自專伏候進止

勾雜劇

慶均天壤可無燕衍之私樂備古今斯有俳優之戲仰
祈天笑雜劇來歟

放小兒隊

音容秀整被服鮮華干羽初陳來謁舜階之下風雲既
闕却歸沛邑之中再拜天墀相將好去

勾女童隊

寶階三道取化國於逡巡力士五丁獻仙山於咫尺中有
驂鸞之侶來呈舞鳳之工鐘律方諧兩軍女童入隊

隊名

九重開舞地一氣結歌雲

問女童

翩若鸞鸞來自風塵之表璫然珠玉隨生謦咳之間詞
令必多雍容敷奏

女童致語

妾聞昔歲誕彌浴致九龍之瑞茲辰飲御舞騰百馬之
豪蓋以下伸臣子歸報之心上奉祖宗舉行之事藹頌
聲而並作鬱協氣以橫流恭惟皇帝陛下育德淵微收
功敏妙殆致邦刑之措數膺年穀之穰露効甘滋近在
禁嚴之地蠶呈異璽自成組織之丈至於三韓獻金匱
之書五嶺貢炎洲之布貺符既至氛沴自銷比置酒於
未央實廣恩於長信妾等家居京甸籍占梨園間雅奏
之發揚謹成班列瞻睟容之懌穆願奉歡愉未敢自專

伏候進止

勾雜劇

仰瞻魏闕橫佳氣之鬱蔥
申命優臣示湛恩之汪濊
少停舞袂雜劇來歟

放女童隊

綴行變婉步節虛璧月瓊枝
整相輝於宮闕朝雲暮
雨盡各返於山川再拜天階
相將好去

范太史集卷三十三

欽定四庫全書

范太史集卷三十四

宋 范祖禹 撰

啓狀

回知涪州張朝奉賀啓

右某近奉命書進升左史寵靈非次惕厲靡容力抗封
章願收綸綍方旁求於俊彥宜不假於器名祿勝已則
近貪聲過情而有恥荷聖神之迴聽察孤賤之由衷乾
坤之仁曲垂於從欲日月之照下逮於容光獲寢過恩

還祇舊職豈謂伏蒙知郡朝奉至誠樂善厚義敦風初
傳命於置郵遽占書於記室遠詒慶問仰服勞謙拜貺
尤深銘藏無斁下情不任感荷之至

回陝西都運葉待制謝啓

伏審光奉命書近升法從付兵民之大計總關陝之奧
區慶典惟行僉言允協恭惟某官天資彊敏行表方嚴
以才猷結主知以儒雅飭吏事優游餘刃揮發壯圖朝
廷倚之以豐財士論期之於亮采仲山將命曾無吐茹

之私孟博登車漫有澄清之志整擁旄於方面俄易節
於外臺吏自不欺服劉晏精明之智軍無絕餉推蕭何
轉漕之功上寬顧憂時所資仰未遑修慶遽辱貽書瞻
令德以惟勤奉謙光而載惕其於感頌曷罄敷宣

回喬學士謝啓

伏審祇膺宸綽進直書林伏惟慶慰竊以人文化成莫
先於典籍古訓是式實賴於賢才恭惟祖宗以來尤重
館閣之設詳延天下方聞之士討論上世帝王之書所

以昭雲漢之文章盛乾坤之德業凡居是職即踐清途
自非卓有異能曷稱妙選恭以侍講學士瑚璉妙器杞
梓天材漸游夏之淵源兼卿雲之華藻景行推於鄉黨
清名聳於縉紳領袖一時著龜後學宗藩朱邱久賴於
敷經芝閣蓬山復留於校籍大任茲始輿論所歸側聞
褒升尤切忤蹈未馳慶牘先枉謝緘載研蘊藻之文益
仰謙冲之德誦言無斁永光篋笥之藏佩服殊深更甚
瓊瑰之賜制拘出謁禮阻造門謹奉啓陳賀兼謝

回孫舍人謝啓

伏審光膺宸綽進直掖垣伏惟慶慰竊以內史之贊宰
司邇臣之與國論茲任尤重得人為難詔見王者之心
詞鼓天下之動賞罰號令之所自出典謨訓誥於是乎
成發諸朝廷沛若江河之決書之方策炳若日星之垂
自非傑異之才曷稱光華之選恭以中書舍人行成坊
表學造淵源蚤以方聞入奉大對忠言切於利行直節
見於當官出處歸潔其身夷險不易其操迨夫訪落倚

以繩愆霜簡所加朝紳自肅諫垣鯁議深沃清衷蜀宇
宣風久勞外使繇螭塗之近列陟綸閣之清班黼藻訓
詞方發揮於賢業謀謨王體實參贊於鴻猷公論所歸
柄任茲始欽聞成命竊慶登賢未遑剡牘之儀先辱貽
書之貺感誦無數敷述奚殫

回顏舍人謝啓

伏審祇膺帝制進直綸闈伏惟慶慰竊以內史之贊宰
司邇臣之與國論茲任尤重得人為難詔見王者之心

詞鼓天下之勳賞罰號令之所自出典謨訓誥於是乎
成發諸朝廷沛若江河之決書之方冊炳若日星之垂
自非潤色之才曷副光華之選恭惟中書舍人行爲坊
表學造淵源蚤由直道之行進被先朝之遇宣風使部
有仲山之將明分職郎曹見公孫之潤飾論經王府載
筆闕廷益隆當宁之知顯奉試言之名越從左史序進
西垣矧令養賢而及萬民籲俊以尊上帝欲圖庶政之
人實賴近侍之良惟出入起居固不欽故左右前後無

非正交修后德時亮天工延登哲人協慰公論益觀遠
業光輔鴻猷某久以庸虛幸同陪侍欽聞成命竊忤私
懷辱眎長言過形謙德感頌激切不任下情

回館職謝啓

伏審祇奉宸綽進直書林伏惟慶慰竊以人文化成莫
先於典籍古訓是式實賴於賢才恭惟祖宗以來尤重
館閣之設詳延天下方聞之士討論上世帝王之書所
以昭雲漢之文章盛乾坤之德業厯觀前哲皆踐此塗

自非問望之隆曷副高華之選恭惟學士幾深蘊識德
性存誠由孔孟之門墻入淵騫之壺奧居今之世與古
為徒宜進登於天朝久退避於公府上庠講道師表儒
紳庶子治官典司宗籍逮茲德舉允協僉諧東觀校讎
尚有留賢之嘆西清顧問行膺側席之求欽聞褒升尤
切喜忭特紆傾蓋重辱貽書仰譙眷之過隆拜嘉貽而
已厚制拘出謁禮阻造門感悚之深不任下懇

回孔舍人謝啓

伏審祇膺帝制進直綸闡伏惟慶慰竊以內史之贊宰
司邇臣之與國論茲任尤重得人為難詔見王者之心
詞鼓天下之動賞罰號令之所自出典謨訓誥於是乎
成發諸朝廷沛若江河之決書之方冊粲若日星之垂
自非潤色之才曷副光華之選恭惟中書舍人系承聖
裔學號儒宗實有力於斯文屢先鳴於多士令德中積
英聲四馳冊府著書虞庠教胄經帷勸講罔非堯舜之
談詞掖代言式是商周之體越從左史序進西垣矧今

養賢而及萬民。顧俊以尊上帝。欲圖庶政之人。實賴近臣之良。惟出入起居。罔不欽故。左右前後。無非正交。修后德。時亮天工。延登哲人。協慰公論。益光遠業。久輔鴻猷。某久以庸虛。幸聯陪侍。忝預交遊。之末。獲聞風義。之詳。昔參賜第之榮。今遂同朝之願。欽聆成命。竊忤私懷。辱貺長言。過形謙德。感頌激切。不任下情。

回陳舍人謝啓

伏審祗膺帝制。進直綸闈。伏惟慶慰。竊以內史之贊宰

司邇臣之與國論茲任尤重得人為難詔見王者之心
詞鼓天下之動賞罰號令之所自出典謨訓誥於是乎
成發諸朝廷沛若江河之決書之方冊粲若日星之垂
自非潤色之才曷副光華之選恭惟中書舍人才通倫
類學造淵源懿文為吾道之表儀高行乃諸儒之準的
先鳴多士獨擅英聲布武青雲久淹高步初慶郎曹而
分職旋聞柱史以記言侍咫尺之天威雖膺妙選出綵
綸之帝制乃副僉言矧今養賢而及萬民籲俊以尊上

帝欲圖庶政之人實賴近侍之良惟出入起居固不欽
故左右前後無非正交修后德時亮天工延登哲人協慰
公論益觀遠業光輔鴻猷某久以庸虛幸聯陪侍忝預
交游之末獲聞風義之詳昔參賜第之榮今遂同朝之
願欽聆成命竊忤私懷辱賜長言過形謙德感頌激切
不任下情

回知郡周承議賀啓

比者叨奉命書進升講席固辭弗獲居寵惟憂伏念某

學古迂疎受才譎薄誤參華於法從遽召直於禁林祇
率舊章懇祈散秩初謂一麾而出守終膺三接之延登
執帙經帷特復久虛之職紬書史觀俾成傳信之文顧
省衰疲詎勝眷委此蓋某官至誠樂善厚義敦風過有
獎成迺容冒處曲垂慶問益仰謙勤感誦所深喻言奚
悉

回賀翰林學士狀

比者祇奉綸言進陞禁直久玷露門之講復塵浴殿之

班蓋獎飾之有初致寵光之誤及特紆慶問深切感悰
謝訪及狀

伏蒙尊慈特垂寵訪拙疾為梗造謁未遑感悚之深不
任下懇

回知全州王左藏賀冬啓

永州

伏以書雲紀瑞測日迎長是為建子之正宜享自天之
佑伏惟某官膺時納慶與國均休阻修賓謁之儀特辱
音書之貺感頌之切敷述奚宣

回知道州秦承議賀冬啓

上同

伏惟某官懿文博古厚德庇民聊敷政於方州竚

告猷於宸扆逢時之吉受祉無疆

下同前

回縣令以下賀冬狀

亞歲令辰特煩慶問感佩之至但切下情

回鄰州通判啓

賓州

謫居湘浦已仰高風遠徙邊州復鄰治境伏窮閭而念
咎通記室以不遑豈意謙光復垂書問載披華藻如佩

芬蘭伏惟通判宣德世濟忠嘉天資明哲孝友施政愷
悌宜民出貳名藩久洽聞於輿頌入朝宸扆行峻被於
寵章厚義所臨瞻言尤切永惟銘感曷罄叙陳

納采啓

夙仰慶閥願修嘉好某第二子溫樸愚粗立日訓義方
賢女令淑有聞尚勤姆教已協宜家之卜敢先納采之
儀欣幸所深喻言奚悲

代資政公回司馬諫議言定狀

某啓積善之家有慶正卿之世其昌特紆用雁之儀奚
取食飭之美第五十三姪孫女未閑姆教尚在冲年令
姪承務蚤服義方已親外傳遽示問名之禮俾修合姓
之歡嘉命所臨固辭弗獲愧無以喻言不能宣

代富公回豫章郡王狀

伏念退老田廬久違朝闕沐雲天之澤幸偃息於太和
仰邦族之仁徒詠歌於信厚惟筋骸之難勉致牋問之
靡通逖想光儀坐馳勞素屬園陵之展事承騶馳之在

途緬惟跋履之勤倍協保綏之妙恭以大王慶源鍾粹
景行推高懷德惟寧用強於周道為善最樂有美乎漢
風分寶玉以隆恩錫朕膳而異禮表儀藩后屏翰天朝
實資夾輔之賢永底變雍之盛敢圖謙眷俯逮衰殘特
垂貺於緘縢頓生輝於部室其於銘荷曷罄敷宣

代王宣徽北京謝兩府啓

比者祇膺中詔再鎮北門撫全魏之封畿總元戎之節
制偃藩之始思職為憂伏念某官闕雖深事功匪立視

秩二府久塵徽省之班歷守三都屢掌帝宮之籥間祈
安逸越去近嚴爰領使於殊庭幸息勞於私館屬合宮
之歲事祇召節以陪祠肆覲威顏具瞻衡弼俄奉中天
之命復叨朔部之行言念衰遲豈勝寄委此蓋某官斟
酌元化登翼大猷率同羣后之心光輔一人之治顧惟
舊物嘗預僉諧特於戶牖之間曲加甄藻之賜致茲樗
散被乃帝俞敢不寅亮敦誠勤勞宣力庶裨毫髮仰答
坏陶

代司馬公回趙龍圖啓

伏審祗膺宸渥榮總藩條還內閣之禁嚴委中軍之節
制淵衷所簡僉議允諧恭以經略龍圖敏智為資公忠
秉節出逢亨會自結眷知領使外臺遠邇想聞其風績
臨戎極塞朝廷倚賴其籌謀屬王旅之徂征驅傳車而
西邁勤勞夙夜經畫始終惟隴右之故區乃關中之外
屏往宣廟畧必得珍才果膺推轂之行復峻登壇之拜
折衝禦侮從容樽俎之間柔遠安邊弭息烽燧之警欽

聞成命方切欣悰猶稽慶問之儀遽辱華牋之貺興言感忭曷罄敷陳

與集賢相公啓

以下代文潞公

伏自一別光儀十踰稔歲仰熒煌之星座久曠音書荷
塊北之化鈞屢分符竹屬因山而藏事承整駕以在塗
載惟跋履之勤懋協保綏之勝恭以某官中和秉德密
勿告猷發揮經濟之文登翊昌明之運天工時亮帝載
惟熙闕

品物無不茂遂自宮闈之過密及

龜筮之告期特輟宰司遠護仙駕萬方同軌共嚴聖后
之喪三事登車實總橋山之禮某留司管籥祇奉陵園
夙夜惟勤雖殫於拙力期會所迫實懼於闕供仰繫庇
賴之私獲免曠療之咎將候迎於公衮增系望於心局
更冀上為廟朝精調寢饋云云

岐王嘉王先狀

伏以聖后賓天因山制禮賢王扈蹕整駕在塗仰惟跋
歷之勞仍盡哀摧之感神明所佑寢饋惟和某居守都

畿祇事陵邑阻伸慰覲第切瞻馳

曹侍中先狀

伏以聖后賓天橋山卜壤特倚戚藩之重遠陪仙蹕
之儀恭惟夙駕之勤仍盡哀號之感即詣展慰預切
馳誠

山陵集賢相公

伏以聖后賓天橋山卜壤特委宰司之重遠陪仙馭之
儀跋履封圻勤勞夙夜神明佑助寢饋康和仰惟哀慕

之餘無爽節宣之勝即詣叅觀預切瞻依

禮儀使以下先狀

伏以聖后賓天橋山卜壤特委侍臣之重遠陪仙馭之儀即遂披承預深瞻跂

回隨靈駕皇親先狀

伏審肅駕行軒遠護仙蹕俯臨近甸特枉緘滕感佩之私不任下悃

謝兩府啓

比者祇奉渙恩俾司洛宅解北門之莞鑰畫西土之封
畿荷寵惟優偃藩茲佚伏念某久塵上袞素乏異能出
入三朝勤勞四紀自避繁於樞府旋改鎮於魏都再奉
命書七更歲籥引年甚懇陳力無堪累叩天閭未迴宸
聽屬合宮之歲事趨召節以陪祠肆覲威顏具瞻衡弼
期盡還於印紱獲歸老於田廬不圖寵進上公禮優羣
后莫容謝事猶委分符任隆周召之勲庸榮極甫申之
褒賞帝宮居守私室就安此蓋某官登翼大猷斟酌元

化勤收舊物廣厚羣倫秉國論以僉諧贊上心之簡在
致茲衰朽叨被恩榮惟修屏翰之勤庶答陶鎔之賜感
銘至切敷叙奚殫

謝章參政啓

近奉詔書特賜詩序眷恩隆厚麗藻鋪宣君都臣俞戴
若太山之重聖作明述寵踰華袞之褒參政太中蘊嘉
謀猷有大手筆親膺睿旨渙發英詞臯陶賜言乃贊襄
於舜帝吉甫作誦實歸美於宣王載觀叙事之工益慶

逢辰之極刊之琬琰永為不朽之光飾以青黃俯愧無庸之質感佩之切不任下情

與兩制啓

某近膺召節入侍祠宮宸眷曲加便蕃渥澤逢辰之幸衰朽極榮伏蒙軒車訪臨垂慰欣企奉別如昨瞻懷實勞欲丐雅章以寵行色少煩藻思永為部室之光也附答布懇幸惟悉察不宣

謝兩制寄詩別啓

伏蒙英私垂貺佳什寵賁衰質發揮榮遇言贈之美穆如清風誦詠于再感服無斁當令琰刻永為家寶奉啓
述謝一二不宣

答蔡參政別啓

伏蒙寵示先公太師誌文發揮潛德薦慰幽壤論譔之美光於無窮積善餘慶信為不誣顯親揚名何以尚此眷私之厚雅故不遺循覽再三感服無斁叙謝之懇言不能宣

謝史館王相公別啓

昨蒙聖恩賜詩寵行繼以上宰賡歌盛作二府諸公併
紉雅製固已焜耀為榮無窮今復蒙送示兩制館閣羣
賢之詩文采相輝增諸琰刻遂使私室上有聖神雲漢
之章次有舉朝公卿大夫清風之誦求之近古蓋所未
聞此豈獨衰朽之光亦足以見邦國風化之厚也苟非
上恩隆異深眷優禮同德協贊上承下率為之寵數殊
於等倫何以致茲盛事乎幸甚幸甚奉啓叙謝言不能

宣

謝執政啓

向緣謝事入覲威顏特辱撫謙俯臨僻陋玉津賜宴瓊
林寵行同醉堯觴共飽周德聖作物覩兩承天漢之章
君都臣俞疊委宗工之製卿雲比爛華袞垂褒臯陶賡
歌蓋奉惟幾之命吉甫作誦皆貽孔碩之詩焜燿歸塗
輝光蔀室永惟榮幸實罕比倫仰宸眷之曲私見邦風
之篤厚言旋里閑方遠台閤感戀增深銘藏至切

與兩府賀冬狀

伏以書雲紀瑞測日迎長挺萬物之幽萌亞三朝之元
會恭惟某官氣鍾英粹道契亨嘉師尹庶工式協具瞻
之望燮和元化宣膺助順之祥阻伸慶謁之儀徒切傾
依之懇

曹郡王

某官慶承勲閥望重戚藩兼馬鄧之寵榮大許申之土
宇升陽介祉並國延休歡頌所叢名言罔既

元資政

某官懿文華國令望端朝夙推職衮之功日奉經帷之
對升陽屈序視履延祥慶頌所深名言罔既

賀樞密孫知院啓

伏審奉膺廷誥進長天樞伏惟慶慰恭以某官沈正秉
彛惠和迪哲登于廊廟益隆當宁之知委以鈞衡遂冠
本兵之任阻修慶謁第切歡悰

賀樞密呂正議啓

伏審祇膺明詔進位中樞伏惟慶慰恭以某官問望端
朝誠明體國經綸之學已參翊於洪機啓沃之忠更倚
毗於近輔欽聞嘉命深切歡悰

賀樞密韓太中啓

伏審祇奉命書進登樞府伏惟慶慰恭以某官時推問
望世濟忠純簡在上心久贊襄於機政擢居近輔爰登
翊於聖謀聞命以還歡言豈叙

賀都承旨張客省啓

伏審祇奉制恩總承樞筦伏惟慶慰恭以某官通才成
務敏誠造微密勿帝猷久司於宣納彌綸機政進貳於
疑丞欣忭所深名言豈叙

回熙州苗團練謝啓

伏審祇膺溫綍就領价藩撫隴右之故封分閭外之隆
寄折衝禦侮久欽名將之風柔遠安邊遂總中軍之政
威懷殊俗宣布上仁承協嘉時已臨盛府遽貽芳訊備
識冲規感佩所深喻言奚既

賀北京王太尉啓

伏審光膺綸綍寵建旌旄進登上將之壇再領留都之
鑰帝心妙簡輿論均歡恭以留守太尉夙冠時英遍參
法從奧學本乎經濟賢業發於盛明出入三朝蕃宣四
國撫封畿於全魏壯屏翰於神都樽俎折衝方倚老成
之碩畫詩書謀帥乃揚休命於外廷懋典傳聞欣悚交
切阻修慶謁倍積瞻馳

回謝北京王太尉啓

近者伏審留守太尉顯奉命書榮分將鉞敢圖謙眷首
墜緘滕國朝草五季之弊風重三軍之節制元戎之寄
必屬名儒舊德之求乃登上將矧踐揚之滋久惟問望
之素隆僉謀所諧寵拜宜渥鎮魏都之巨屏護朔野之
列城幕府初開藩閫增重遽煩記室遠示書筠感忭交
深喻言奚既

賀王太尉啓

伏審光膺帝制進陟將壇榮擁節旄再司宮鑰伏惟慶

慰恭以留守太尉英名高世碩望端朝遍參法從之華
升翊大猷之美清衷妙簡僉議攸歸全魏撫封方倚安
邊之畧中軍制閫爰加授鉞之崇開府云初偃藩增重
欽聞誕告實切歡悰阻伸望履之儀第極瞻風之素

回熙州趙龍圖啓

比審祇膺宸渥榮總藩條伏惟慶慰經畧龍圖夙以才
升自結主眷外臺領使風采著聞極塞臨戎方畧屢上
復峻齋壇之拜還登內閣之華竚觀遠猷益對來寵方

開幕府首墜書筠感忭所深喻言矣既

賀韓樞密知院啓

伏審奉膺廷誥正位天樞伏惟慶慰恭以某官世濟純
忠時歸碩望延登廊廟益隆當宁之知進秉鈞衡遂冠
本兵之任壯邦家之柱石宣帷幄之籌謀翊贊聖明鎮
服中外阻修慶謁第切歡悰

賀安副樞啓

伏審祇膺帝制進位天樞伏惟慶慰恭以某官沉正秉

彞惠和迪哲訏謨足以經遠厚德足以鎮浮法從參華
宣忠勞於内外地官領計隆問望於弼諧允當夢卜之
求升贊璿璣之政淵衷妙簡輿論僉諧阻伸慶謁之儀
第切瞻依之至

賀留守韓相公啓

伏審光膺帝制榮鎮洛師伏惟慶慰恭以某官厚德明
謨純誠亮節再登上宰協贊太平領使殊庭聳具瞻於
四海陪祠泰時祇顯相於一人寵建節旄出司宮鑰眷

求元輔分正成周先十乘以啓行冠諸侯而述職某乞
身得謝交政預榮將覲高風倍欣勞素

謝兩府狀

祇奉命書獲解宮鑰恩容就第寵冠在廷雖辭兼鎮之
隆尚忝維師之拜措紳聳嘆閭里光榮竊念某被遇三
朝服勞累紀迭居二府厯拜五闕駢珪組以褒崇慙鼎彝
之勲伐自縱心而請老無虛歲以告歸荷異禮之眷留
示至仁之厚賜賜詔盈几輶軒接塗以及耄期始諧夙

志天惟從欲俯矜一物之誠相亦有終遂繼前人之美
極臣鄰之榮遇實今古之罕倫此蓋某官登翊皇猷布
昭元化人惟求舊義不忘勞紆廊廟之矢謨贊聖神之
軫慮閔其衰篤許遂佚休猥以華顛膺茲殊渥方棲僻
陋退屏塵紛荷德至深誦言奚既

謝外任前兩府啓

某官左右王家緝熙帝載夙贊鈞衡之化嘗紆廊廟之
言致此衰遲獲遂休佚復膺殊渥不廢舊勞感幸所深

喻言奚既

兩制

某官勵翼帝猷參華法從允諧僉論交贊清衷

以下同

曹郡王

某官望重藩垣地兼勲戚贊襄上德柔惠邦風

以下同


北京王太尉

某官望重本朝任隆羣后敦風茲久樂善有初

以下同

回謝孫觀丈啓

祇奉制函俯從懇請恩容就第寵冠在廷伏念某被遇
三朝服勞累紀久塵上衮無補鴻猷早聞知止之風備
竭告歸之懇上仁篤厚眷禮縻留已寢迫於耄期始聽
還於官政惟寵光之絕異非涯分之可安此蓋某官左
右王家緝熙帝載夙冠鈞衡之任嘗紆廊廟之言致此
衰遲獲全終始方力辭於天寵將退託於里居幸謝塵
紛即安休佚鄰封密邇慶問先臨仰懷求舊之私益見
敦風之美永惟感佩曷罄敷宣



范太史集卷三十四